



სსიპ სახელმწიფო
შესყიდვების
სააგენტო

08 / აგვისტო / 2024 წ.



KA080186223830824

№ 2167

განკარგულება

შპს „ერ ტე დეს“ შავ სიაში დარეგისტრირების შესახებ

შემსყიდველი ორგანიზაცია: საქართველოს რეგიონული განვითარებისა და ინფრასტრუქტურის სამინისტროს გამგებლობაში არსებული სახელმწიფო საქვეუნებო დაწესებულება – საქართველოს საავტომობილო გზების დეპარტამენტი;

ტენდერის ნომერი: NAT210012014;

შესყიდვის ობიექტი: 45200000 – მთლიანი ან ნაწილობრივი სამშენებლო სამუშაოები და სამოქალაქო მშენებლობის სამუშაოები;

მიმწოდებელი: შპს „ერ ტე დეს“ (ს/ნ: 406102550);

წერილობითი შეტყობინების საფუძველი: სახელმწიფო შესყიდვის შესახებ ხელშეკრულებით ნაკისრი ვალდებულებების არაჯეროვანი შესრულება.

აღწერილობითი ნაწილი

1. ადმინისტრაციული წარმოების დაწყება

1.1. სახელმწიფო შესყიდვების სააგენტოში 2024 წლის 3 ივლისს წარმოდგენილ იქნა საქართველოს რეგიონული განვითარებისა და ინფრასტრუქტურის სამინისტროს გამგებლობაში არსებული სახელმწიფო საქვეუნებო დაწესებულების – საქართველოს საავტომობილო გზების დეპარტამენტის 2024 წლის 2 ივლისის № MRDI-RDN2-15/9479 წერილობითი შეტყობინება (რეგისტრაციის № 5493), რომლითაც სააგენტოს ეცნობა შპს „ერ ტე დეს“ (ს/ნ: 406102550) მიერ NAT210012014 ელექტრონული ტენდერის შედეგად დადებული 2021 წლის 4 ნოემბრის № 105-21 სახელმწიფო შესყიდვის შესახებ ხელშეკრულებით ნაკისრი ვალდებულებების არაჯეროვანი შესრულების თაობაზე.

1.2. სააგენტომ მიმწოდებელს, სახელმწიფო შესყიდვების ერთიან ელექტრონულ სისტემაში მის პროფილში მითითებული ელექტრონული ფოსტის მისამართის ertedeltid@gmail.com მეშვეობით, 2024 წლის 5 ივლისის № 2035 წერილით, აცნობა სააგენტოში შემსყიდველი ორგანიზაციის წერილობითი შეტყობინების წარმოდგენის თაობაზე და, სახელმწიფო შესყიდვების სააგენტოს თავმჯდომარის 2015 წლის 29 ოქტომბრის № 19 ბრძანებით დამტკიცებული „შავი სიის წარმოების წესისა და პირობების“ მე-5 მუხლის მე-5 პუნქტის შესაბამისად, სთხოვა ხსენებულ საქმეზე წერილობითი განმარტების წარმოდგენა.

1.3. მიმწოდებელმა 2024 წლის 12 ივლისს სააგენტოში წარმოადგინა 2024 წლის 12 ივლისის განმარტება (რეგისტრაციის № 5774) მის მიერ NAT210012014 ელექტრონული ტენდერის შედეგად დადებული 2021 წლის 4

ნომბრის № 105-21 სახელმწიფო შესყიდვის შესახებ ხელშეკრულებით ნაკისრი ვალდებულებების არაჯეროვანი შესრულების თაობაზე.

2. შემსყიდველი ორგანიზაციის პოზიცია

შემსყიდველი ორგანიზაციის წერილობითი შეტყობინების თანახმად, მიმწოდებელი არაჯეროვნად შეასრულა 2021 წლის 4 ნომბრის № 105-21 სახელმწიფო შესყიდვის შესახებ ხელშეკრულებით ნაკისრი ვალდებულებები. ამასთან, გასულია ხელშეკრულების მოქმედების ვადა.

3. მიმწოდებლის პოზიცია

მიმწოდებელი არ ეთანხმება მისი შავ სიაში დარეგისტრირების შესახებ შემსყიდველი ორგანიზაციის მოთხოვნას და აღნიშნავს, რომ სამუშაოების შესრულების შეფერხების პროცესთან შემსყიდველი ორგანიზაციის გულგრილი დამოკიდებულებიდან გამომდინარე, სარჩელით მიმართა სასამართლოს მის წინააღმდეგ, სადაც მითითებულია შემსყიდველი ორგანიზაციის მხრიდან მიმწოდებლის მიმართ ხელშეკრულების მოქმედების ვადებისა და სამუშაოების შესრულების ვადების მიმართ არაკეთილსინდისიერი მიდგომა და დამოკიდებულება. მიმწოდებლის განმარტებით, მისი შავ სიაში დარეგისტრირება მიმწოდებლისათვის გამოიწვევს მძიმე სამართლებრივ შედეგს, კერძოდ, კომპანიას მიადგება მნიშვნელოვანი მატერიალური ზიანი, იგი შეიძლება დადგეს გადახდისუნარობის რისკის წინაშე, რამდენადაც მიმწოდებელი წარმოადგენს ინფრასტრუქტურული პროექტების მშენებელ კომპანიას, ხოლო 1 წლის ვადით სახელმწიფო შესყიდვებში მონაწილეობის აკრძალვით, კომპანიას მიადგება გამოუსწორებელი მატერიალური ზიანი. ამასთან, შავ სიაში დარეგისტრირების ფაქტი უარყოფით ზემოქმედებას მოახდენს მათ საქმიან რეპუტაციაზე. ამასთან, მიმწოდებელი ადმინისტრაციული წარმოების ფარგლებში ითხოვს ზეპირი სხდომის გამართვას.

4. სააგენტოს მიერ დადგენილი გარემოებები

4.1. 2021 წლის 4 ნომბერს, NAT210012014 ელექტრონული ტენდერის საშუალებით, საქართველოს რეგიონული განვითარებისა და ინფრასტრუქტურის სამინისტროს გამგებლობაში არსებული სახელმწიფო საქვეუნებო დაწესებულებას – საქართველოს საავტომობილო გზების დეპარტამენტსა და შპს „ერ ტე დეს“ (ს/ნ: 406102550) შორის დაიდო № 105-21 სახელმწიფო შესყიდვის შესახებ ხელშეკრულება, რომლის თანახმად, მიმწოდებელს სამუშაოების დაწყების შესახებ შემსყიდველი ორგანიზაციის წერილობითი დავალების გაცემიდან 16 თვის ვადაში უნდა შეესრულებინა მარნეული-თეთრიწყარო-წალკის საავტომობილო გზისკმ15-კმ30 მონაკვეთის სარეაბილიტაციო სამუშაოები. ხელშეკრულების ღირებულებად განსაზღვრა 8 699 999,97 ლარი, ხოლო მოქმედების ვადად – 2023 წლის 13 ივნისი.

4.2. მხარეთა შორის გაფორმებული შეთანხმებებით ცვლილებები განხორციელდა ხარჯთაღრიცხვაში, მიმწოდებელს 2023 წლის 31 აგვისტოს ჩათვლით განესაზღვრა დამატებითი ვადა, ხოლო ხელშეკრულების მოქმედების ვადად განისაზღვრა 2024 წლის 15 ივნისი.

4.3. შემსყიდველი ორგანიზაციის 2023 წლის 23 აგვისტოს № MRDI-RDN2-04/13825 წერილის მიხედვით, ობიექტზე სამუშაოები მიმდინარეობდა დაბალი ტემპით, რის გამოც არსებობდა საფრთხე, რომ სახელშეკრულებო ვადაში ვერ დასრულდებოდა სამუშაოები. ამავე წერილით, შემსყიდველმა ორგანიზაციამ მიმწოდებელს მოუწოდა სამუშაოთა დროულად დასრულების მიზნით უზრუნველყო მუშაპერსონალისა და მანქანა-მექანიზმების მობილიზება, წინააღმდეგ შემთხვევაში გააფრთხილა ხელშეკრულებით გათვალისწინებული სანქციების გამოყენების შესახებ.

4.4. მიმწოდებელმა 2023 წლის 25 აგვისტოს № 25/08-02 წერილით შემსყიდველ ორგანიზაციას აცნობა, რომ 2023 წლის 1 მაისიდან 2023 წლის 23 აგვისტოს ჩათვლით 53 დღის განმავლობაში არსებული ნალექიანი დღეებისა და სამშენებლო ობიექტზე სხვა კომპანიის მიერ სამუშაოების წარმოების გამო სამუშაოები მიმდინარეობდა შეფერხებით. ამავე წერილის მიხედვით, სავალი ნაწილის 80% მოქცეული იყო ორივე ფენაში, ობიექტზე აქტიურად მიმდინარეობდა გზის მოწყობის სამუშაოები, მათ შორის, მიერთებები, ეზოში შესასვლელებისა და ტროტუარების მოწყობა. ამავე წერილით, მიმწოდებელმა შემსყიდველ ორგანიზაციას მიმართა სამუშაოების შესრულების ვადის 2023 წლის 31 ოქტომბრის ჩათვლით გაგრძელების თხოვნით.

4.5. საქმეში არსებული საზედამხედველო კომპანიის, „Egis International“-ის, 2023 წლის 31 აგვისტოს № E6841 წერილის მიხედვით, ობიექტზე სამუშაოები მიმდინარეობდა ნელი ტემპით, რის გამოც მიზანშეწონილად არ იქნა მიჩნეული სამუშაოების შესრულების ვადის გაგრძელება. ამავე წერილით, საზედამხედველო კომპანია „Egis International“-მა შემსყიდველ ორგანიზაციას მოუწოდა ხელშეკრულებით გათვალისწინებული ზომების გამოყენებისაკენ.

4.6. შემსყიდველი ორგანიზაციის 2023 წლის 15 სექტემბრის № MRDI-RDN2-15/15028 წერილით ირკვევა, რომ ხელშეკრულების მოქმედების ვადის გაგრძელების, სამუშაოების შესრულების ვადის გასვლისა და სამუშაოების წარმოების ხელშემშლელი გარემოებების არარსებობის მიუხედავად, ხელშეკრულებით გათვალისწინებული სამუშაოები მიმდინარეობდა დაბალი ტემპით და არ იყო დასრულებული, რის გამოც მიმწოდებელს დაეკისრა პირგასამტეხლო. ამავე წერილის მიხედვით, მიმწოდებელს არაერთხელ ეცნობა სამშენებლო სამუშაოების არადაამაკმაყოფილებელი ტემპის გაზრდის საჭიროების შესახებ. ამავე წერილით, შემსყიდველმა ორგანიზაციამ მიმწოდებელს მოუწოდა დროულად დაესრულებინა სამუშაოები,

წინააღმდეგ შემთხვევაში გააფრთხილა ხელშეკრულებითა და კანონმდებლობით გათვალისწინებული ღონისძიებების შესახებ.

4.7. შემსყიდველი ორგანიზაციის 2024 წლის 12 თებერვლის № MRDI-RDN2-04/1676 წერილით ირკვევა, რომ სამუშაოები მიმდინარეობდა დაბალი ტემპით, ობიექტზე არ იყო მობილიზებული საჭირო რაოდენობის ტექნიკა და მუშა-პერსონალი, რაც იწვევდა მიმწოდებლის მხრიდან სამუშაოების შესრულების გაჭიანურებას. ამავე წერილით, შემსყიდველმა ორგანიზაციამ მიმწოდებელს მოუწოდა რესურსების მობილიზებისა და სამუშაოების დროულად დასრულებისაკენ, წინააღმდეგ შემთხვევაში გააფრთხილა ხელშეკრულებითა და კანონმდებლობით გათვალისწინებული ღონისძიებების შესახებ.

4.8. შემსყიდველი ორგანიზაციის 2024 წლის 12 ივნისის № MRDI-RDN2-04/8418 წერილით ირკვევა, რომ ობიექტზე არ არსებობდა სამუშაოების წარმოების შემაფერხებელი გარემოებები. ამავე წერილით, შემსყიდველმა ორგანიზაციამ მიმწოდებელს მოუწოდა ხელშეკრულების მოქმედების ვადის გასვლამდე ხელშეკრულებით ნაკისრი ვალდებულებების სრულად და ჯეროვნად შესრულებისაკენ, წინააღმდეგ შემთხვევაში გააფრთხილა ხელშეკრულებით გათვალისწინებული სანქციების გამოყენების შესახებ.

4.9. მიმწოდებელმა შემსყიდველ ორგანიზაციას 2024 წლის 13 ივნისის №13/06-04 წერილით აცნობა, რომ უხვი ნალექისა და სეტყვის გამო სამუშაოები მიმდინარეობდა შეფერხებით. ამავე წერილით, მიმწოდებელმა შემსყიდველ ორგანიზაციას მიმართა თხოვნით 2024 წლის 31 ივლისის ჩათვლით გაეგრძელებინა ხელშეკრულების მოქმედების ვადა.

4.10. საბედამხედველო კომპანიამ, „Egis International“-მა, 2024 წლის 18 ივნისს შემსყიდველ ორგანიზაციას აცნობა, რომ სამუშაოები მიმდინარეობდა დაბალი ტემპით, ობიექტზე არ იყო მობილიზებული საჭირო რაოდენობის ტექნიკა და მუშა-პერსონალი, ხოლო ასფალტბეტონის საფარის ქვედა ფენა საჭიროებდა საფუძველთან ერთად სრულად შეცვლას, რისი სამუშაოებიც არ მიმდინარეობდა. ამავე წერილის მიხედვით, 2024 წლის მაისის თვეში არსებული ნალექის გამო მიმწოდებელს ერთხელ უკვე გაუხანგრძლივდა ხელშეკრულების მოქმედების ვადა, ხოლო ხელშეკრულების მოქმედების ვადა ამოიწურა 2024 წლის 15 ივნისს. ამავე წერილით, საბედამხედველო კომპანია „Egis International“-მა შემსყიდველ ორგანიზაციას მოუწოდა ხელშეკრულებით გათვალისწინებული ზომების გამოყენებისაკენ.

4.11. შემსყიდველი ორგანიზაციის 2024 წლის 1 ივლისის № MRDI-RDN2-15/9360 წერილით ირკვევა, რომ მიმწოდებელმა 2022 წლის აპრილიდან 2022 წლის აგვისტოს ჩათვლით, ხელისშემშლელი გარემოებების არარსებობის პირობებში, დაარღვია გეგმა-გრაფიკით გათვალისწინებული ვალდებულებები, კერძოდ, 2022 წლის აპრილის თვეში მიმწოდებელმა 605 000 ლარის ნაცვლად შეასრულა 58 614.42 ლარის სამუშაოები, 2022 წლის მაისის თვეში 750 000 ლარის ნაცვლად – 74 852.72 ლარის სამუშაოები, 2022 წლის ივნისის თვეში 890 000 ლარის ნაცვლად – 209 856.40 ლარის სამუშაოები, 2022 წლის ივლისის თვეში 1 190 000 ლარის ნაცვლად – 239 757.46 ლარის სამუშაოები, ხოლო 2022 წლის აგვისტოს თვეში 1 290 000 ლარის ნაცვლად – 307 183.94 ლარის სამუშაოები. ამავე წერილის მიხედვით, დამატებითი ვადის განსაზღვრისა და ხელშეკრულების მოქმედების ვადის გაგრძელების მიუხედავად, ვალდებულების შესრულების დამაბრკოლებელი გარემოებების არარსებობის პირობებში მიმწოდებელმა ვერ უზრუნველყო სამუშაოების განსახორციელებლად საჭირო მანქანა-დანადგარებისა და მუშა-პერსონალის მობილიზება. ამასთან, ხელშეკრულებით გათვალისწინებულ საავტომობილო გზის მონაკვეთზე შეიმჩნეოდა საავტომობილო ორმოები, რაც საფრთხეს უქმნიდა საავტომობილო გზით მოსარგებლეთა უსაფრთხო გადაადგილებას.

4.12. მხარეთა შორის გაფორმებული მიღება-ჩაბარების აქტებით ირკვევა, რომ მიმწოდებელმა შეასრულა 5 878 929,41 ლარის სამუშაო, რაც ხელშეკრულების ღირებულების 68%-ს შეადგენს.

სამოტივაციო ნაწილი

5. შემაჯამებელი დასკვნა

საქმეში არსებული მტკიცებულებებისა და გარემოებების შეფასებისა და ურთიერთშეჯერების საფუძველზე, სააგენტო მიიჩნევს, რომ შპს „ერ ტე დე“ უნდა დარეგისტრირდეს შავ სიაში.

6. გამოყენებული სამართლებრივი აქტები

სახელმწიფო შესყიდვების სააგენტოს თავმჯდომარის 2015 წლის 29 ოქტომბრის № 19 ბრძანებით დამტკიცებული „შავი სიის წარმოების წესი და პირობები“.

7. სამართლებრივი შეფასება

7.1. სახელმწიფო შესყიდვების სააგენტოს თავმჯდომარის 2015 წლის 29 ოქტომბრის № 19 ბრძანებით დამტკიცებული „შავი სიის წარმოების წესისა და პირობების“ მე-3 მუხლის მე-4 პუნქტის „ბ“ ქვეპუნქტის თანახმად, სახელმწიფო შესყიდვის ნებისმიერი საშუალებით განხორციელებისას, გარდა კონსოლიდირებული ტენდერისა, პრეტენდენტის/მიმწოდებლის შავ სიაში დარეგისტრირების საფუძველია, თუ მიმწოდებელმა ვერ შეასრულა ან არაჯეროვნად შეასრულა ხელშეკრულებით ნაკისრი ვალდებულებები. იმავდროულად, აუცილებელია, რომ ხელშეკრულების მოქმედების ვადა იყოს გასული ან ხელშეკრულება ვადაზე ადრე იყოს შეწყვეტილი.

7.2. იმავე წესის მე-7 მუხლის მე-2 პუნქტის შესაბამისად, საქმეში არსებული გარემოების გამოკვლევის, შეფასებისა და ურთიერთშეჯერების შედეგად, სააგენტო ადგენს, არსებობს თუ არა პრეტენდენტის/ მიმწოდებლის შავ სიაში დარეგისტრირების საფუძველი. იმ შემთხვევაში, თუ არსებობს ამ მუხლის მე-4 პუნქტით გათვალისწინებული გარემოებები, სააგენტო იღებს გადაწყვეტილებას პრეტენდენტის/ მიმწოდებლის შავ სიაში დარეგისტრირებაზე უარის თქმის შესახებ, ხოლო იმ შემთხვევაში, თუ არსებობს პრეტენდენტის/ მიმწოდებლის შავ სიაში დარეგისტრირების საფუძველი, სააგენტო, ამ მუხლის შესაბამისად, იღებს გადაწყვეტილებას პრეტენდენტის/ მიმწოდებლის გაფრთხილების ან შავ სიაში დარეგისტრირების შესახებ.

7.3. განსახილველ შემთხვევაში, ირკვევა, რომ მიმწოდებელმა არაჯეროვნად შეასრულა 2021 წლის 4 ნოემბრის №105-21 სახელმწიფო შესყიდვის შესახებ ხელშეკრულებით ნაკისრი ვალდებულებები. სააგენტო ყურადღებას ამახვილებს შემსყიდველი ორგანიზაციის 2024 წლის 1 ივლისის № MRDI-RDN2-15/9360 წერილზე, რომლითაც ირკვევა, რომ 2022 წლის აპრილიდან 2022 წლის აგვისტოს ჩათვლით, მიმწოდებელი არღვევდა გეგმა-გრაფიკით გათვალისწინებულ ვალდებულებებს, ხოლო დამატებითი ვადის განსაზღვრისა და ხელშეკრულების მოქმედების ვადის არაერთხელ გაგრძელების მიუხედავად, ვალდებულების შესრულების დამაბრკოლებელი გარემოებების არარსებობის პირობებში მიმწოდებელმა ვერ უზრუნველყო სამუშაოების განსახორციელებლად საჭირო მანქანა-დანადგარების/ მუშა-პერსონალის მობილიზება და სრულად ვერ შეასრულა ხელშეკრულებით გათვალისწინებული სამუშაოები. ამასთან, ხელშეკრულებით გათვალისწინებულ საავტომობილო გზის მონაკვეთზე შეიმჩნეოდა საავარიო ორმოები, რაც საფრთხეს უქმნიდა საავტომობილო გზით მოსარგებლეთა უსაფრთხო გადაადგილებას. საგულისხმოა ისიც, რომ ადმინისტრაციული წარმოების ფარგლებში მიმწოდებელს არ წარმოუდგენია სასამართლოს განჩინება, რომლითაც სააგენტოს შეეზღუდებოდა შემსყიდველი ორგანიზაციის წერილობით შეტყობინებაზე გადაწყვეტილების მიღების უფლება. რაც შეეხება ზეპირი მოსმენის გამართვას, სახელმწიფო შესყიდვების სააგენტოს თავმჯდომარის 2015 წლის 29 ოქტომბრის № 19 ბრძანებით დამტკიცებული „შავი სიის წარმოების წესისა და პირობების“ მე-5 მუხლის მე-8 პუნქტის თანახმად, საქმის გარემოებებიდან გამომდინარე, სააგენტო უფლებამოსილია, მოუსმინოს დაინტერესებულ მხარეებს. შესაბამისად, ზეპირი მოსმენის ჩატარება განეკუთვნება სააგენტოს უფლებამოსილებას და გამოიყენება საქმის გარემოებებიდან გამომდინარე. განსახილველ შემთხვევაში სააგენტომ მიზანშეწონილად არ მიიჩნია ზეპირი მოსმენის ჩატარება. ამდენად, აღნიშნული მსჯელობის გათვალისწინებით, სახეზე არ არის მიმწოდებლის პასუხისმგებლობის გამომრიცხავი გარემოებები და არსებობს მისი გაფრთხილების ან შავ სიაში დარეგისტრირების წინაპირობა.

7.4. სახელმწიფო შესყიდვების სააგენტოს თავმჯდომარის 2015 წლის 29 ოქტომბრის № 19 ბრძანებით დამტკიცებული „შავი სიის წარმოების წესისა და პირობების“ მე-7 მუხლის მე-3 პუნქტის შესაბამისად, გაფრთხილების ან შავ სიაში დარეგისტრირების შესახებ გადაწყვეტილების მიღებისას, სააგენტო, საქმისთვის მნიშვნელობის მქონე გარემოებებთან ერთად, დამატებით ითვალისწინებს დარღვევის სიმძიმეს, პრეტენდენტის/ მიმწოდებლის მანამდე მიღებული გაფრთხილების ან/და შავ სიაში რეგისტრაციის ფაქტ(ებ)ს.

7.5. აღსანიშნავია, რომ შპს „ერ ტე დე“ (ს/ნ: 406102550) 2024 წლის 6 თებერვალს დარეგისტრირდა შავ სიაში NAT230001040 ელექტრონული ტენდერის საშუალებით დადებული 2023 წლის 27 თებერვლის №01.01.01/30/84 სახელმწიფო შესყიდვის შესახებ ხელშეკრულებით ნაკისრი ვალდებულებების არაჯეროვანი შესრულების გამო.

7.6. სახელმწიფო შესყიდვების სააგენტოს თავმჯდომარის 2015 წლის 29 ოქტომბრის № 19 ბრძანებით დამტკიცებული „შავი სიის წარმოების წესისა და პირობების“ მე-7 მუხლის მე-6 პუნქტის თანახმად, შავ სიაში დარეგისტრირების შესახებ გადაწყვეტილება მიიღება იმ შემთხვევაში, თუ შემსყიდველი ორგანიზაციის მიერ წარდგენილი ინფორმაცია სრულად აკმაყოფილებს ამ წესის მე-3 და მე-4 მუხლებით განსაზღვრულ მოთხოვნებს და არ არის სახეზე შავ სიაში დარეგისტრირებაზე უარის თქმის ან გაფრთხილების საფუძველი.

7.7. სააგენტო მიიჩნევს, რომ შემსყიდველი ორგანიზაციის წერილობითი შეტყობინება აკმაყოფილებს ზემოხსენებული წესის მე-3 და მე-4 მუხლებით განსაზღვრულ მოთხოვნებს. ამასთან, სახეზეა მიმწოდებლის შავ სიაში დარეგისტრირების წინაპირობა და არ არსებობს მისი შავ სიაში დარეგისტრირებაზე უარის თქმის ან გაფრთხილების საფუძველები, რადგან მიმწოდებელმა არაჯეროვნად შეასრულა სახელმწიფო შესყიდვის შესახებ ხელშეკრულებით ნაკისრი ვალდებულებები. შესაბამისად, მოცემული დარღვევისა და მიმწოდებლის მანამდე არსებული შავ სიაში რეგისტრაციის ფაქტის გათვალისწინებით, შპს „ერ ტე დე“ უნდა დარეგისტრირდეს შავ სიაში.


სარეზოლუციო ნაწილი

სააგენტომ იხელმძღვანელა სახელმწიფო შესყიდვების სააგენტოს თავმჯდომარის 2015 წლის 29 ოქტომბრის №19 ბრძანებით დამტკიცებული „შავი სიის წარმოების წესისა და პირობების“ მე-7 მუხლის მე-6 პუნქტით და დაადგინა:

1. შპს „ერ ტე დე“ (ს/ნ: 406102550) 2024 წლის 9 აგვისტოს დარეგისტრირდეს შავ სიაში.
2. ამ განკარგულების აღსრულება დაევალოს სახელმწიფო შესყიდვების სააგენტოს ინფორმაციული ტექნოლოგიების დეპარტამენტს.

3. ეს განკარგულება შეიძლება გასაჩივრდეს მისი ოფიციალური გაცნობის დღიდან ერთი თვის ვადაში, თბილისის საქალაქო სასამართლოს ადმინისტრაციულ საქმეთა კოლეგიაში (ქ. თბილისი, დავით აღმაშენებლის ხეივანი №64), კანონმდებლობით დადგენილი წესით.

თავმჯდომარე

ხელმოწერილია/
შტამგდასმულია
ელექტრონულად 

ლევან რაზმაძე